

## নিউইয়র্কে প্রথম স্থায়ী শহীদ মিনার নির্মিত হচ্ছে লাগোডিয়া কলেজে

■ শহীদুল ইসলাম, যুক্তরাষ্ট্র

মহান একুশের ভাষা শহীদদের স্মরণে বাংলাদেশি শিক্ষার্থীদের উদ্যোগে যুক্তরাষ্ট্রের নিউইয়র্কে প্রথমবারের মতো নির্মিত হতে যাচ্ছে স্থায়ী শহীদ মিনার। সিটি ইউনিভার্সিটি অব নিউইয়র্কের লাগোডিয়া কমিউনিটি কলেজে এ শহীদ মিনার নির্মাণের প্রয়োজনীয় উদ্যোগ নেওয়া হচ্ছে।

যুক্তরাষ্ট্রের নিউইয়র্কে বসবাসরত বাংলাদেশি কমিউনিটির দীর্ঘদিনের একটি স্বপ্ন ছিল স্থায়ী শহীদ মিনারের। কিন্তু নানা জটিলতায় সে স্বপ্ন আজো পূরণ হয়নি। সর্বশেষ যুক্তরাষ্ট্র ছাত্রলীগের সভাপতি জাহিদ হাসান নিউইয়র্কের সিটি ইউনিভার্সিটি অব নিউইয়র্ক-এর আওতাধীন লাগোডিয়া কমিউনিটি কলেজের ছাত্র থাকা অবস্থায় স্টুডেন্ট গভর্নমেন্ট অ্যাসোসিয়েশনের মাধ্যমে স্থায়ী শহীদ মিনার নির্মাণের চেষ্টা চালান। কিন্তু তখন তিনি সফল হননি। কিন্তু দীর্ঘদিন পর সফল হতে চলেছেন ছাত্রলীগ নেতা জাহিদ।

জাহিদ হাসান জানান, ইউনেস্কো কর্তৃক ভাষা শহীদদের অবদানের স্বীকৃতির জন্য ২১ ফেব্রুয়ারিকে আন্তর্জাতিক মাতৃভাষা দিবস পালনের গুরুত্বপূর্ণ তথ্য সংগ্রহ করে একটি প্রোফাইল তৈরি করি। লাগোডিয়া স্টুডেন্ট গভর্নমেন্ট অ্যাসোসিয়েশনের সভার সঙ্গে আলাপ আলোচনা করেও ব্যর্থ হয়েছিলাম। কিন্তু আমি চ্যাম্প ছাড়াইনি। পরবর্তীকালে ছোট ভাই রায়হান মাহমুদ লাগোডিয়া কলেজ স্টুডেন্ট গভর্নমেন্ট অ্যাসোসিয়েশনের গভর্নর নির্বাচিত হলে তার কাছে শহীদ মিনার নির্মাণের গুরুত্ব সংবলিত সেই প্রোফাইল এবং শহীদ মিনারের নকশা তুলে দেই। রায়হান মাহমুদ স্টুডেন্ট গভর্নমেন্ট অ্যাসোসিয়েশনের কাছে বিলটি নতুন করে প্রস্তাব করে।

এ প্রসঙ্গে রায়হান মাহমুদ জানান, শহীদ মিনার নির্মাণের বিলটি স্টুডেন্ট গভর্নমেন্ট অ্যাসোসিয়েশনের কাছে পেশ করার পর ১২ জন গভর্নরের মধ্যে ৮ জন গভর্নর ওই প্রস্তাবে সম্মতি জানান এবং গত ২৫ জানুয়ারি বিলটি স্টুডেন্ট গভর্নমেন্টে পাস হয়। স্টুডেন্ট গভর্নমেন্ট অ্যাসোসিয়েশনের যে আটজন প্রতিনিধি প্রস্তাবিত বিলে সম্মতি দিয়েছেন, তারা হলেন, ফজলে রাব্বি, শেখ হাফিজ, জয়ি ফার্নান্ডেজ, ইয়ং জো, ইয়ংগরু জিয়াও, জিয়ায়ন লি-ও ইয়াইউ বাউ। এরই মধ্যে শহীদ মিনার স্থাপনের জন্য খরচ বাবদ আট হাজার ডলার স্টুডেন্ট গভর্নমেন্ট অ্যাসোসিয়েশন থেকে অনুমোদন দেয়া হয়েছে। লাগোডিয়া কমিউনিটি কলেজের 'ই' বিল্ডিং এবং 'এম' বিল্ডিংয়ের মাঝে খোলা চত্বরে ১০ ফুট দৈর্ঘ্য ও ১০ ফুট প্রস্থের স্থায়ী শহীদ মিনারটি তৈরি হবে বলে জানা গেছে।

উল্লেখ্য, বাংলা ভাষাকে রাষ্ট্রভাষা করার দাবিতে ১৯৫২ সালের ২১ ফেব্রুয়ারি আত্মদানকারী শহীদদের স্বীকৃতি স্বরূপ ১৯৯৯ সালের ১৭ নভেম্বর ইউনেস্কো ২১ ফেব্রুয়ারিকে আন্তর্জাতিক মাতৃভাষা দিবস হিসেবে ঘোষণা করে। এরপর কানাডাসহ পৃথিবীর বিভিন্ন দেশে শহীদ মিনার নির্মিত হয়। এরই ধারাবাহিকতায় এবার টাকার কেন্দ্রীয় শহীদ মিনারের আদলে নিউইয়র্কে নির্মিত হতে যাচ্ছে স্থায়ী শহীদ মিনার।